

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Mizoram Universal Health Care Scheme kalpui mekah Sorkar chuan Private Hospital te nen inrawn tlanga, dawhkan khat kilho a inbiakremna kawng zawn zel chu a duh dan a ni, a ti
- 2. Rampum HuapSa ruihhlo do beihpui thlakna, Nasha Mukh Bharat Abhiyan chu Mizoramah pawh kawng hrang hrangin kalpui mek a ni.
- 3. Iran-a India mi awmte hruai haw beihpui, ngawrh lehzuala kal pui a ni.
- 4. Iran missile-in Israel chhim lama Soroka damdawi in kap fuhin thi leh hliam engemawzat an awm.



MUHCS

Mizoram Universal HealthCare Scheme (MUHCS) kalpui mekah Sorkar chuan mipuite hmakhua ngaiin Private Hospital te nen inrawn tlanga, dawhkan khat kilho a inbiakremna kawng zawn zel chu a duh dan a ni, a ti.

Private Hospital intelkhawm pawl – Non Government Hospital Association thuchhuah chhanglet in Mizoram State Health Care Society chuan he thu hi a sawi a, an thuchhuahah chuan Private Hospital intelkhawm pawl hian Cashless avangin nitin sum lut awm lo tura an ngai chu a diklo a ni an ti a, Sawrkar lam chuan Cheng Nuaih 50 advance a pek a inhuam bakah kar tinin damdawiin bill hi pek thin a ni a, an buai lo turah a ngai a ni a ni.

MUHCS rate hi zaa 50-80 vela hniam zawk anga sawi chu hriatchian loh vang ni a a lan thu sawiin , Phai lam Hospital leh Mizoram Private hospitalte chu Rate chungchangah te, Quality chungchangah te, Grading chungchangah te khaikhin chi a ni loan ti a, heti chung hian Sorkar chuan, Mizoram Private Hospital-te chu duattakin Phai lam hospital te nen rate inang tlang a s siamsak bakah, hemi piah lamah pawh hian sawipui a la inhuam cheu a ni a ti.

Phai lam Non-empanelled Hospital te, reimbursement phalsak anga sawi chu a dik ziktluak tih pawh sawiin, MUCHS guidelines emergency-ah emaw Empanelled Hospital ten an enkawl theihloh natna bikah chuan Phai emaw Mizoram chhung emaw pawh ni se Non-empanelled Hospital-ah chuan reimbursement theih reng a ni, an ti.



IDY

Mizoram University Yoga Centre Co-ordinator Prof. Sanjay Kumar-an Mizoram University huamchhunga zirlai leh zirtirtu tam takin nitin Yoga hmanga an insawizawi thin thu sawin , nun hrisel zawk neih nan tangkai takin Yoga chu an hmang thin a ni a ti.

Vawiina Akashvaniin a kawmnaah Prof. Sanjay Kumar chuan he thu hi sawiin International Day of Yoga pualin hun hrang hrang buatsaih a nih thu a sawi a. Tun thla ni 7 atang khan Yoga Training cum Workshop Programme (Shivir) in Common Yoga Protocol chu International Day of Yoga pualin Inrinni thleng awh turin Yoga Centre, Mizoram University-ah buatsaih a nih thu a sawi a. Vawin khan International Day of Yoga pualin Elocution Competition buatsaih a ni a thupuih zirlaite nuna Yoga pawimawhna ‘Importance of Yoga in Student’s Life’ tih hman a ni a ti.

Prof. Sanjay Kumar chuan tun thla ni 21, International Day of Yoga vawi 11-na chu Mizoram University Multipurpose Hall-ah zing dar 6 leh minute 15 atangin hun an hman tan dawn thu a sawi a, Mizoram University zirlaite bakah zirtirtute an tel dawn thu a sawi a ni.

<><><>

NASHA MUKT BHARAT/CADS

Rampum huapa ruihhlo do beihpui thlakna , Nasha Mukh Bharat Abhiyan chu kawng hrang hrangin kalpui mek a ni a, Mizoramah pawh pawl hrang hrang hrang leh sorkar department hrang hrangin hma an la mek.

Mizorama ruihhlo dona kawnga hma la tu zinga pakhat Central YMA-in Akashvani an hrilh danin an hnuaia ruihhlo do beihpui thlaktu CADS te report an neih thar ber thla hmasa ni 31 atanga tun thla ni 13 inkar chhung khan ruihhlo, No. 4 hawng 72 leh tictac bur 138 an man tawh a. Hemi hun chhung tho hian ganja kg 1 leh gram 700, codein bur 964, preganalin mum 586, AP mum 50, leh adang thahnem takan man bawk a ni.

Central YMA chuan heng ruihhlo kaihnawihah hian mi 106 man tawhin an zinga 43 chu counselling pek an ni a, Excise & narcotics hnenah mi 9 pek an ni a, mi 2 Home-ah dah an ni bawk.

<><><>

INTERNATIONAL DAY AGAINST DRUG ABUSE & ILLICIT TRAFFICKING/MSACS SEMINAR ON DRUG ABUSE

Social Welfare Minister Pi Lalrinpuii chuan Mizoramah kum naupangtea ruihhlo khawih an tam tak hle thu leh lungchhiatthlak a tih thu a sawi.

Vawiina I&PR Conference Hall, Liangchhiari run, Aizawla Social Welfare Department leh School Education department tangkawpin an buatsaih middle school zirtirtute tana buatsaih ruihhlo hmansual invenna chungchang inzirtirna a hmanpuinaah he thu hi Minister chuan a sawi a. Minister chuan zirlai naupangte chu ruihhlo hman sualna laka fihlim tura zirtirna pek uar a ngaih thu a sawi a. Zirlai naupangte chu an hun tam zawk school-a hmang an nih avangin zirtirtuten naupangte nunah hmun pawimawh tak an luah thu leh, naupang te ruihhlo laka an fihlim theih nan zirtirtuten mawhphurhna lian tak an nei a ni a ti.

Vawiin vek khan Mizoram State AIDS Control Society buatsaih ruihhlo hmansual chungchang zirna seminar ‘Seminar on Drug Abuse in Mizoram’ chu Health Minister Pi Lalrinpuii hoin Taxation Department Conference Hall, Aizawlah hman a ni bawk a. Minister chuan ruihhloin Mizoram a run takzet thu leh theihtawp an chhuah chung pawha hneh zawh a har thu a sawi a, kut kuangkuah san theih a ni lo a ti.

Akashvani zawhna chhangin MSACS Assistant Director Dr. Lalruatsangi chuan hun hman dan tlangpui a sawi.

<><><>

11 yrs MODI GOVT

Kum 11 chhunga Prime Minister Narendra Modi kaihhruaina hnuaia BJP Sorkar hmalakna thehdarh turin vawiin khan National Secretary, Minority Morcha Pu Delson Notlia, leh Dr.K.Beichhua MLA ten Lawngtlai Press Club ah press conf an ko a,

Pu Delson Notlia chuan kum 11 chhung BJP in Sorkarna a chelh chhungin India chuan chaktakin hma a sawn tih sawiin, Hlemhletna ah Central Sorkar a fihlim a, Jail tanphah leh an dinhmun hlihsak ngai an awmlo a ti a, Miretheite hnen thlengphak hmasawnna chu a takin an dawntur leh chanvo diktak Miretheiten an chang thei a ti.

Prime Minister chuan VIP Culture a tibo va, India chu khawvela Mihring tam berna ram niin, kum 2047 India in kum 100 a tlin hun ah chuan kawng hrang hranga ram hmasawnah hlankai BJP Sorkar chuan tumin beihpui a thlak mek a ni a ti.

Mizoram Sorkar chuan BJP a thawhpuiloh vangin Mizoram tan Annual Budget bak haichhuah theih an nei mumallo a ti bawk.

Dr.K.Beichhua, MLA chuan kum 11 chhungin India-in hmasawnna ruhrel din kawngah te, Zirna lamah te, Information Tehnology ah te hmasawnna chhuanawm tak a nei a ti a, mihring an mamawh bulpui hrang hrangte chu ram mipui ten hnianghnar takin an nei mek tih sawiin, mirethei zawkte a thlawna buhfai pek thin pawh kum 2029 thleng chhunzawm a ni dawn a ti.

BJP hruaituten Chanchinbumite an kawmna ah hian LADC a Chief Executive Member Pu N.Zangura leh BJP Lai District President Pi Vanlalhruaii Vandirte bakah BJP, MDC Pu BN Thangpuia te pawh an tel ani.

<><><>

AIR HOSTESS REMAINS ARRIVES

Ahmedabad-a Air India thlawhna tlaa Cabin Crew thi Manipur state mi Zohnahthlak nula Lamnunthem Singson ruang chu vawiin chawhnu khan Dimapur thlen pui a ni a, mi thahnem takin ruang an lo hmuak.

Ruang hi Kuki Union, Dimapur leh Civil Society Organisation hrang hrang ten airport-ah an lo dawngsawng a. Ruang lo hmuahna hunah hian Nagaland sorkar aiawhin Dimapur DC le Dimapur Commissioner of Police te chuan a ruang chungah puan a lo dah a ni.

Lamnunthem Singson ruang hi a chenna Manipur panin Dimapur atangin Kuki Students Organisation – Sadar Hills hruainain chhuahpui nghal a ni a. Zaninah a chenna khua Kangpokpi a thlen beisei a ni.

Air India thlawhna hi June 12 khan London pan tura Ahmedabad airport atanga a thlawhchhuah hnu reiloteah a tla a, hetah hian a chhunga

chuang mi 242 zinga 241 an thi a, hei bakah a tlakna hmun BJ Medical College-a lo awm mi tam takin nunna an chan bawk a ni.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve ah Chanchinthar puan leh a ni ang.

<><><>

IRAN EVACUATION

Sorkar laipui chuan Iran-a India mi awmte, hruai haw beihpui, ngawrh lehzualin a kal pui a a, Iran hmar lama zirna avanga awm India mi 110-in New Delhi an lo thleng tawh a ni.

Minister of State for External Affairs, Kirti Vardhan Singh-a’n New Delhi-a thuthar lakhawmtute a hrilh danin, Iran-a India khua leh tui awmte hnen atangin Iran atanga hruai haw tura ngenna 350 chuang, sorkarin a dawng tawh a, vawiin khan India mi tangkhangte thiar chhuaktu tur thlawhna pakhat, Turkmenistan-ah tirh a ni.

Puan tawh angin, Iran leh Israel inkar boruak chhe chho zel avangin sorkar laipui chuan Iran-a India mite thiar chhuah beihpui, Operation Sindhu a kalpui a ni.

<><><>

ISRAEL-IRAN WAR

Israel leh Iran inbeihna kal zelah tukin khan Iran missile-in Israel chhim lama damdawi in lian kap fuhin mi engemawzatin hliam an tuar a, Israel lam pawhin Iran-a nuclear tih chhiat tumin nasa takin an kap chhunzawm zel a ni.

Iran hian tukin khan missile 25 chuang a kap chhuak a, Iran Revolutionary Guard Corps sawi danin Israel sipai cyber command hmunpui leh Gav Yam-a Israel Intelligence Centre-te chu hlawhtling takin an kap chhia a ni. Israel lam chuan mi 24 an thih thu leh Sorokka damdawi in-in a tuar nasat ber thu a sawi.

<><><>

NEET PAPER LEAK CASE

NEET MBBS entrance exam zawhna put ru thubuai kal zelah Enforcement Directorate (ED)-in Patna leh Ranchi bakah hmun dang engemawzatah dapchhuah beihpui an thlak a, ED hotute sawi danin, he thubuaia a mawhphurtu bera puh, Sanjeev Mukhiya leh a thurualpuite chenna in leh an hnathawhna hmunte dap a ni.

Doctor zir tur thlanna exam zawhna hi a put ru tih nikum khan Bihar Police hnuaia Economic Offences Unit-in an hmuchhuak a, he thila a mawhphurtu ber Mukhiya hi pawl inhlawmkhawm kal tlangin competitive exam

danga zawhna put ru chungchangah pawh a inhnamhnawih a, nikum vek khan
Bihar Police-in an man a ni.

